

四庫全書

集部

欽定四庫全書

集部

古今禪藻集卷八

九

詳校官庶吉士臣謝恭銘

主事銜臣徐以坤覆勘

總校官庶吉士臣倉聖脉

校對官中書臣葉 葵

謄錄監生臣馬紹基

欽定四庫全書

古今禪藻集卷八

明釋止勉釋性通同輯

宋

五言古詩

贈峽山清倫禪師

簡長

三首

褰衣汲靈水
混滌巾屢塵
烟靄霽杉竹
澄凝此心神
高僧灑真雨
澤彼寒草春
華月寫空印
清霜肅齋身
猶言振金策
歸作耶溪隣

夜感

無眠動歸心寒燈坐將滅長恐浮雲生奪我西窗月

送方仲荀

行客心如何借劍為君歌雨昏山未開
花盡春無多欲知貧別情涕淚空滂沱

湘江有感寄王內翰

行肇四首

達士絃性直佞人膠辭柔靳尚一言巧靈均千古愁孤蟾魄長在寒雲恨難收空使湘江水至今無濁流

中秋對月

暮雨過寥廓江天正青蒼
列樹無殘陰積水有異光
幽蟲鳴欲徧宿鳥驚忽翔
永夜如至公鑒我吟清章

送希晝師之九華

忽起峯外心跡謝人中
境雲去竹堂空鷺下秋池
靜野宿清溪深月在諸峯
頂日暮立長江遙看片帆影

汎若耶溪

霽雨牽野情孤舟逐茲賞
積水連遠空落日垂萬象
岸

回雲獨隨山轉泉更響望望極寒源猶言放輕漿

擬古

慧崇

幽禽迎曙響佳木含春榮獨有綺窗婦耿耿萬里情塵
色皓鴛幌日華明風箏高益久不返中宵自懷貞

念佛三昧詩

并敘

遵式

四首

叙曰念佛三昧踐聖之妙道凡揭厲于法流者何莫
由斯矣晉慧遠師化潯陽集賢輩乘之為際極之軌
瑯琊王喬之洎羣賢皆為念佛三昧詩遠為序皇宋

丙申沙門遵式會四明高尚之賓百餘人春冬二仲
一日一夜萃寶雲講堂想無量覺行漢魏經壬寅既
廢適台之東山忽思俄成故事惜無遠馬乃擬晉馬
作詩寄題于石垂于後世也詩四章章八句

萬感外形骸儼然虛堂寂明毫冠羣彩幽神資始績妙
象非夙預俗覽豈良覲拊之會入微清玩心無憚

其二

金肌昧真見八音愚正聞玄空了無託至涉寧有勛森

羅會都寂長空銷積氛良哉此達觀局士安與云

其三

融抱迴曲照熙如鑑中象諦覽無遺心虛求非滯想追
夢忘始終通幽宛如往藉此會神姿逍遙期西賞

其四

鑑極玄想孤動靜如為區大象詎形儀大方誰廉隅正
賞不隱括妙踐無迴迂心澄徧知海粲粲黃金軀

白雲謠送明教嵩禪師歸山

懷璉

白雲人間來不染飛埃色遙爍太陽輝萬態情何極嗟
嗟輕肥子見擬垂天翼圖南誠有機去當六月息寧知
網緼采無心任吾適天宇一何遼舒卷非留迹

古意

契嵩十二首

風吹一點雲散漫為春雨洒余松柏林青葱枝可取持
此歲寒操手中空楚楚幽谷無人來日暮意誰與

其二

雲中見雙鳥高飛揭日月毛羽貴文章翱翔異鷹鷂條

然邈千里竟不顧林樾春風漫飄颻勁翮更超忽陌上
遊俠子窺爾徒倉卒雖有金彈丸睥睨不敢發因知竒
異資自保長超越回視黃雀羣胡為戀塵堦

其三

堪笑浮雲高凌虛翳日星

凌虛或作扶搖

寧作蘭蕙幽草中自

芳馨自足乃天分未需爾虛靈掩翳之所惡胡為久亭
亭古來曠達士浪跡多晦暝山林惜長往藏用亦藏形
愚谷不可及窅然還自寧嗟余亦羨此岑寂養頽齡

感遇五首

海水晦夜清秋色涵蓬壺有叟雙龍公鐵網羅珊瑚風雲
浩容與悵恨何所圖欲問天上人可換明月無

其二

仙人白玉京去去何縹緲瓊樓十二層玲瓏汎雲表銀
湟月為波萬頃即池沼秋來宮殿光逗落人間曉空際
時澄明烟霞眇青鳥可見不可到所思空杳杳

其三

天威不到處干戈動邊鄙將軍奮威猛英雄勢隨起紛
紛出榆關肅肅秋色裏白馬冒黃雲清霜厲嚴旨少壯
羽林兒務能莫多喜好武匪君心用兵不得已寄言飛
將軍妙畧應無比志在報君恩豈為黃金死丈夫身許
國慷慨當如此寧教太史書輕笑魯連子

其四

空虛澄遠烟霽色含秋景思君每盤桓駐目千峯頂明
月初團圓可照美人影美人來不來雲霞渺林嶺

其五

松柏地之靈草莽亦同茂願得區域中心復純素蒼
梧會稽陰罔復有陵墓六合無知音青山有歸路人生
惜朱顏鑒照長相顧昨夜露華臺誰不怨秋暮

懷越中兼示山陰諸明士

厭見人境喧清游憶靈越東南千萬山浮青滿寥泝從
來鑑中景形勝人間絕月湛換我鷺溪雲起藏書穴客子
若飄蓬遽與故人別尺素未及通芳草已云歇所悲行

路難俯仰損名節鳴鳳欲東飛寄語謝明月

山舍晚歸

薄暮還精廬徐行無所並日入月還清山空水更靜彷彿聞疎鐘條然在西嶺寄語高世流來茲謝塵境

讀書

讀書老何為更讀聊遮眼此意雖等閒高情寄無限錯磨千古心翻覆幾忘飯不知白雲去春靜山中晚

遊大慈山書畫上人壁

谷裏侵雲寺尋幽到深處春過寒花開人來啼鳥去豈
期草庵客日暮此相遇

廬山雜興

道潛

三十
三首

古帝論匡山南國之德鎮邇來得躋攀此語始吾信雄
雄壓大江轟轟排萬仞青天落飛瀑白日雷霆震石鏡
俄忽開孤光舞而運異花無冬春瑤草亦芳潤遠公初
渡江道譽藹東晉劉雷贊高風遯世各無悶陳跡虎溪
頭于今誰與訊

其二

衆峯勢連環萬疊不可窮香爐獨秀拔佳氣常葱葱長
風卷游霧曉壁開瞳矐招提出其下樓觀排青紅回眸
盼五老刻削金芙蓉宜哉謫仙子愛此巢雲松

其三

白鶴峯後原逶迤曠平陸道周問樵子古實青牛谷披
榛得徑路曳杖驚麋鹿鮑生古騷人曾過鍊師宿明月
古壇邊題詩記脩竹茲焉廢耕隴歲晏空菽粟薄日靜

衡山驚湍瀉哀玉回首睇吾廬風幡隔林麓

其四

山南信美矣山北尤增竒春風錦繡谷紅素自相依
梯空上絕巘雲日驚倒窺崖壁暈祥光五色成頗梨
旁通大林寺松竹短且歌樂天當日游四月桃始披
餘齡願寄此永與世人違

其五

少文好山林每往輒忘歸余生千載後獨與斯人違
竭

來爐峯下結宇聊棲遲長林拱茂木九夏遺炎曦溪雨
晝忽破藤花照清漪黃鸝語深竹可聽不可窺

其六

暮峯騰玄雲飛雨來滂沱亂點洒蒼壁森森掛青蘿須
臾漲前溪蕩蕩浮銀河中流轉巨石出沒如鼉鼉天宇
夜開霽星蟾瑩摩挲玲瓏辨崖樹宛轉照庭柯詠詩無
傑句奈此佳景何

其七

中巖不知暑但覺晝景長朝來出孤定踽踽行西岡風
泉漱石齒松雨飛蒼蒼猿鳥亦我喜鹿麋還相將喬林
積翠下粲然矚孤芳冉冉抱絕格霏霏浮暗香山祇善
守護每吐雲霧藏寄言樵蘇子慎勿輕摧傷

其八

龍湫亘三峽草木皆森竒禪餘得支徑別塢行逶迤上
人吳門秀邈有方外姿芒屨觀兩足策策欣相追秋田
罷刈獲雲水明空陂雙雙林中禽文彩光陸離雍容事

飲啄相顧忘驚飛
鮮飈忽騰馥
崑桂飄葳蕤
峯端卧落
日眷此忘還期

其九

山深雲物清
挹玩洗浮慮
昨日行澗南
飄然即芒屨
風潭耿危杓
晚與樵爭度
隔水認梅花
方驚歲華暮
幽人眇江海
樂事期誰預
山月獨多情
娟娟遲歸路

其十

高崑吐竒雲
條忽千萬丈
援毫欲名貌
卷縮非一狀
飛

仙或遨遊隱隱出其上驚颺忽吹滅轉盼惟青嶂山中
勝事多彼俗誰能亮

其十一

圓月未出嶺衆峯環蒼蒼裴回倚脩竹遲此清夜光俄
驚衆木顛濼濼浮銀潢玉兔既且躍浮雲亦難妨須臾
經中天下矚被八荒却瞻中外官森森斂低昂

其十二

一月廬山陽光風動林壑陰崖折層冰隱隱飛溜落羲

和佐化工萬彙欣並作忽忽鳥聲聒豔豔花霧薄瘦骨
喜攀躋芒屨便犖确期遇山河人賞心將共託

虛寂堂

吾聞卓道士操節如冰霜學窺老莊本淵然闕光芒當
時世莫識落魄依四方嘗為京洛遊不踐聲利場衣裾
卷塵土獨鶴翻南翔千里不駐足飄飄指潯陽潯陽多
名山飛仙共徜徉晚歲隱城郭古宮極淒涼千金售鄰
壤增築成虛堂流塵斷四壁虛白浮中央惜哉今已往

吊影空歎傷，賴有賢弟子。黃冠挺昂藏，區區慕高格。綽
欲傳芬芳，遂客蘇太史。堂堂國之良，言為天下重。墨妙
逾珪璋，為君易華榜。庭戶增輝光，風流滿江左。知子非尋常，

遊詠真洞贈陶道人

淵明骨已朽，陳迹尚可求。我復識其孫，長鬣青兩眸。相
去僅千載，猶能繼風流。寄跡黃冠中，神姿邈清脩。相携
行洞天，暝色藹已浮。松寒語栖鶴，潭靜眠蒼虬。蘭膏照
深夜，風磬鳴重樓。吾廬閔三峽，清淨亦此侔。何時駕鹿

車訪我西林丘

廖司法挽辭

吾聞廖夫子名大不得覩讀書盡五車行義拔前古聚
徒從妙齡所至變鄒魯身雖甘陋巷志欲望伊呂風雲
苟超騰名教當有補蹉跎鬢毛改寸祿晚方取青衫適
南營素幔歸湓浦秋原起新隴寂寞一坏土悲歌動閭
里清血洒如雨蘭玉已含芳行看秀庭戶

歸宗道中

朝日未出海杖藜適松門老樹暗絕壁蕭條聞哀援迤
邐轉谷口悠悠見前村農夫爭道來聒聒更笑喧數辰
競一墟邸店如雲屯或携布與楮或驅雞與犵縱橫箕
帚材瑣細難具論老翁主貿易俯仰衆所尊區區較尋
尺一一手自翻得無筋力疲兩鬢埋霜根吾鄉東南會
百貨常源源金鑲衣短後羣奴列崑崙通衢旅犀象顛
倒同籬藩鮫綃與翡翠觸目亦已繁少壯供所役耆年
卧高軒翁今處窮獨未易聽我言且當具鹽米歸家飯

卷八
兒孫

周茂叔郎中濂溪

蓮花峯下水東出其流長十里漱石齒鏘然韻珩璜坡
陀瀟野岸炯炯浮明光衣冠有曠士眷此宜徜徉乞身
不待老結屋栖其旁高風慕箕顛不羨尚書郎松菊手
自插葱葱蔚連岡了無川澤營庶以廉自方禽魚出堦
塹詎識矰繳防雲山侑几席風月非迎將萬事委空洞
頽然寄壺觴詩書叢屋壁教子心獨強翹翹雙鳳雛炳

炳其文章婆娑刷勁翮雲漢期翱翔高名與溪水千載
同湯湯

秋日西園

日月更代顯光華難並留昔人尚行樂俯仰無暫休平
居得君子出處常相求良辰拔余臂共作西園遊極目
瞰平野緬然見滄洲千林澹霽色萬韻生涼秋露華溥
菊英藹藹香可揉參差間畦隴芋粟森相倚綠蔓無芳
姿碧花茂牽牛低回矚籬落樹影環清流賞物志已諧

何用登蓬丘

其二

嘗聞晉支遁矯志歸沃洲千載激清風邈哉誰與儔余
今雖不敏萬事非身謀竭來卧窮谷未覺慙前脩一法
尚無遣何勞問三休卷舒在至理賞詠歸優游採薇陟
曾阿濯足依澗流但驚桂花拆詎識江漢秋滄溟空汗
漫無意狎羣鷗

其三

憶昔少壯時意氣摩雲霓游心黃卷間豈顧白日西由
來昧根本旦旦從所迷邇獨悟無為文字如委泥物生
豈高下至道良自齊青山遠吾廬開戶衆鳥啼曉日上
喬木秋光媚回溪疇人長往來絕壁同攀躋遐天淨若
掃曠目無端倪楚客一何苦登臨獨悽悽

其四

秋山夜來雨雲氣朝尚昏禪庭無來轍但見落葉繁石
室暗燈火天容開霽痕耳目思遠適曠然啓曾軒長謠

緩輕策去去窮深源方塘澹清流鳧雁靜不喧時遭羲
皇翁容與諧笑言邈然採真賞歲晏誰與論

次韻黃子理宣德田居四時

四序自逶迤田園常局促春陽旋東臯迫我事鋤耨出
種曝籬根驅牛飲溪曲暉暉明朝陽聒聒喧布穀頽齡
惜筋骸曉睡謾云足蓐食出柴門荷蓀赴幽谷寒條視
柔桑密葉已舒綠今年氣候早膏雨厭霖霖鄰翁時一
來耕耨每相屬

其二

離離小麥黃
習習南風度
桑棗暗蓬麻
耘鋤困朝暮
種瓜屋東隅
翠蔓已分布
黃花引踈籬
冉冉欲橫路
白水漫青秧
聯翩下鷗鷺
新絲換濁酒
有藪羞薄具
掃洒聚比鄰
環坐蔭高樹
稚子羨羸餘
牽衣傍翁嫗
牛羊嶺外歸
落日林梢去
餉婦亦還家
笑言隔煙霧

其三

村落已徂暑
蚊蠅尚喧啾
衡門霽朝雨
茅竹歸新秋
機

絲迫鄰女札札無停休中田藹黃稼爛漫如雲浮綠蟻
釀新甕嘉魴釣清流瓦尊遲來客禮數忘獻酬三盃未
肯辭笑語方綢繆時平盜自隱場圃無宵憂兒孫漸束
髮婚嫁迫所謀欸曲從我言歸途蹇淹留林端有月色
相送前溪頭

其四

朔吹鳴高林回塘水已結牛羊卧茅屋原野暗飛雪壯
男臂雕弓短後事田獵飢鷹一號呼荒徑洒毛血歸來

誇意氣隣舍呼飲啜明朝過南山更欲窮窟穴寒爐然
豆萁光燄時起滅布被擁嬌兒從渠踏裏裂老翁寢不
寐展轉念鶩鴨籬落易穿窬狐狸恐驚發

春晴

積雨久不破曾陰蔽城闕曉來得春風掃蕩淨六合綽
約牆頭花依微帶殘月少年誰家子驕騶飛蹀躞揚鞭
出郊外逸興生林樾黃鳥弄柔音青梅已堪折行樂須
及辰芳時易消歇

其二

寒食東城隅青陽夾馳道高樓暖鳳笙絕曲聞縹緲晴
日動鞦韆飛煙拂瑤草南隣與北里良辰競為好人生
逆旅間何必事枯槁仰首笑春風茲懷誰與造

寄邵仲恭

曉雨霽郭郭晴雲逶紛披羲和拆萬物初莖弄葳蕤儵
魚泳弱藻漾漾動碧漪緬彼空際山黛影搖參差感此
芳菲節美人曠佳期音形眇何方莽莽天一涯長河泮

春水花浪激箭馳好憑三尺鯉寄我相思詩

同蘇子瞻秦少游遊惠山二首

杜門暗朝雨寂歷無行人陰曦忽穿漏卉木鬱已新階
泉漱玉齒照眼光磷磷使君美無比卓犖遺囂塵風標
傲竹栢談笑凌穹昊何愧沉冥子卧霞與結隣

其二

揚帆渡江來洗眼驚翠樾雲安既容喬鳥哢更清絕凌
梯訪幽蹤琬琰亦未滅嗟我魚目光疇能綴明月狂墨

掃琅玕風煙座中發殊勝區中人茫茫走飛轍

寄龍井辯才法師

法師安遠徙我見常罄折顏網製像運基構甚宏達煌煌四十載說法傾吳越人天會方丈萬趾常雜遝藹然如丘山四座羞蟻垤投老倦揮松毅然辭且決飢鷹得秋風轉盼俄一掣結茅南山陞雲蘿占幽絕昔我海上還相尋訪林樾夜闌叩微要援鳥寂不聒慧風洒幽襟法雨濯枯枿別來今四載寒暑驚屢閱相望如晨星杳

杳各天末何當從杖藜一笑龍泓月

送慧悟大師還闕下

道人本丘壑浪為京華居一往二十年歲月驚須臾禪
餘挾妙術出入卿大夫飛揚動天子聲聞傾九衢紛彼
戶外屨泛如水中鳧高懷勸酬應逸賞思江湖春風卷
衣襪千里隨舳艫中冷涌樓觀圓嶠連方壺杖策步鰲
頭直上窮崎嶇超然萬象外所得良有餘興來乘白雲

飄飄還帝都

送李仲益赴襄陽幕

襄陽古名都雄觀壓荆楚醉公誇文詞風物粲可數嗟
余未歷覽彷彿已如覩人生游宦間得此亦佳遇李俊
妙天姿文行兩自負少年志冥鴻千里輕一舉天風不
借便造物暫淹阻既無負郭田甌俛依幕府賢哉彼方
伯脫畧高韻度寧俾簿書役朱墨事朝暮爽氣對西山
清談共樽俎試問鹿門翁遺蹤今在否

晚歸

慧詮

落日寒蟬鳴獨歸林下寺柴扉應未掩片月隨行屨唯
聞犬吠聲又入青蘿去

竹徑偶題

清順

久從林下游頗識林下趣從渠綠陰繁不礙清風度閒
來石上眠落葉不知數一鳥忽飛來啼破幽絕處

謁狄梁公廟

德洪
二十一首

九江浪粘天氣勢必東下萬山勒回之到此竟傾瀉如
公廷諍時一快那顧藉君看洗日光正色甚閒暇使唐

不改周誰復如公者古祠蒼煙根碧草上屋瓦我來春
雨餘瞻歎香火罷一讀老范碑頓塵看奔馬斯文如貫
珠字字光照夜整帆更遲留風正不忍掛

同彭淵才謁陶淵明祠讀崔鑒碑

武王既伐紂乃不立微子雖有去惡仁終失存商義夷
齊不肯臣甘作首陽死下視莽操輩欺孤奪幼稚汗面
亦戴天特猴而冠耳桓公弄兵權劉裕竊神器先生於
此時抽身良有以袖手歸去來詩眼飽山翠追還聖之

清太虛絕塵滓長恨千載心斷絃掩流水崔子果何人
賞音乃知此與君讀此碑相視一笑喜

懷慧廓然

蕭蕭暑雨過空山成夜晴月出東南峯娟娟風露清飛
螢自開合寒蟬亦悲鳴興來忽獨往聽此落磬聲永懷
西湖上絕景玉壺明松際脩然姿振策自經行即欲呼
就語忽隔千里程何時徑尋子夜航過臨平呼猿何足
道摩雲亦虛名未若擇法眼能識廓然兄應知像教末

金史曰石人言
卷八
大法欲歌傾談笑復一出要使萬世驚燈火作朝夕已
有相似情願隨人天會仰看辯縱橫

同超然無塵飯栢林寺分題得栢字

沙村宿雨餘炊煙淡寒色山墟蠶市休野飯漁舟隔忽
逢柳際門知有道人宅扣扉山答響童子出迎客空庭
竟何有凍死千年栢鐘鳴食時至老僧揖就席香杭定
宿春露葵應曉摘羌飢一飯美何啻萬錢值風軒納山
翠引手捫石壁愛此玉崔嵬歲久自崩拆下有洄渦泉

甘涼水齒頰勿輕一脈微去漲萬頃澤吾行無疾徐住
佳去亦得欲收有聲畫絕景為摹刻興來勿復緩轉顧成

陳迹

次韻超然游南塔

逸塔不忍去新涼生早秋不見江西月一水空悠悠龕
燈耿晝影遺像青雙眸永懷皇祐間曾此狎沙鷗往事
已陳迹豐碣撐高樓公昔從吾祖來往亦風流但餘松
菊在井臼遺林丘高風不可攀落日令人愁倚杖哦清

金史卷八
卷八
詩溪風波白頭脈脈不能語歸心浩難收今已不如古
無復相綢繆何當效船子華亭從釣舟

次韻龔德顏柳帖

顏柳以字名畫畫法可究後世何寂寥此輩了無有皆
云學未至妙不應心手那知斯人徒德高名往就字工
德不修名與身俱朽吾子佳少年俊氣駒方驟新詩作
行草開軸龍蛇走坐客口為愕我亦知肯首積墨如陂
池積筆高隴阜學之不至顏要亦終至柳此詩聞東坡

請君書座右

贈范伯履承奉二子

大范風月湖小范煙雨柳清明與秀徹風度隨付受醉
闌看落筆已覺風助肘聲名定追尋公卿在懷袖江湖
方縱浪第未一唾手乃公幹國器讜論在人口謫居長
閉門藥方曾校否著書亦細事用舍付杯酒君看雨園
鳩雨晴定呼舊

仁老以墨梅遠景見寄作此謝之

荒寒掃橫斜，稀疎開未徧。煙昏雨毛空，標格終微見。吳
姬風鬢亂，睡色餘妬面。誰令種性香，風味極不淺。道人
三昧力，幻出隨意現。塞管玉纖寒，無勞寫哀怨。

次韻李商老匡山道中望天池

幽人修水上，春漲冒陂田。時時想見之，笑頰微渦旋。往
來柴桑間，妙語生雲煙。廬山自高寒，青碧開晴天。倚藤
望絕頂，風味如斜川。我思從之遊，子亦當勉旃。詩成聊
假寐，歸夢歷層顛。

居上人自雲居來訪白蓮社話明日告歸作此送之

浮雲山盡際花木迎春暉佳人殊方來見之消渴飢藉
草坐松影粉香時落衣氣貌秀可掬出語超幽微巖壁
鐘聲寂山陰花發稀去袂挽莫留又作甌峯歸

次後韻

平生邁往氣醞造次公狂才高簿書縛貌和無歎傷君
看此風味自是萬夫望利害方焚和唾笑皆清涼頽臯

舊廬在頃稻連畝桑時以笏拄頰阻隔如澗岡少陵功名
念看鏡毛髮蒼長哦和秋雨菊林更聞蟹人生行樂耳
萬事付一觴淮南謫天廚大言忘異床吾儕本踈拙閱
世忘否臧願言置此喙無咎持括囊桂賢供火浴龜
虛得剗腸一蓑煙雨蝸兩角我耕南畝君開荒

寄異中

薰風度南枝餘芳委紅綠微雲生晚陰梅雨淨林麓穿
花罵語遲翻泥燕飛速遐想幽人居夢過剡溪曲清聲

久絕耳斯懷抱煩煥仰道思彌高哦詩出凡俗脫屣滿
戶外輪蹄日相逐吾徒不得人大法世陵叔智刃剪蒿
蓬利鋒揮撲檄念往造前席初筮不我卜別來空相思
徙倚蒼山木懸知清興多銀鈎墮盈軸願得三百篇遺
我藏諸櫝如彼知音知價不低金玉

次韻聖任病中作

君詩素雄放出語秀不俗更讀病中吟清婉尤可錄自
愧魯鈍者文字每見辱有取定鄉閭餘事亦何足夫子

飽書史屢曬便便腹蓄深故發遠詩成驚衆自我詩雖
不少俗馬空多肉賴遇禿毛髮苟仕安得祿所至有青
山是處堪藏育行當拂衣去此志吾已卜君須更勉旃
當以謙自牧功成還故鄉竹杖巾一幅永從林下游此
詩無厭讀

送濟上人歸漳南

密林影羣陰露葉光翻夕幽人獨經行滿院許秋色幾
年涉嶺海頗亦歷佳席邇來寄江寺癡坐室生白吾家

在漳南萬頃蒼玉壁何當附舶歸重拂林下石此生一
夢耳夢覺試尋繹倚筇作長嘯萬事付鳥迹若有閒中
吟無惜寄飛翼

夏日雨晴過宗上人房

仲夏林木深古寺雨初足殿閣風甌鳴閒庭草空綠小
軒試凭几解籜愛新竹點筆記題詩粉色不受觸道人
有佳處面數良以熟脩然亦無營來往相追逐此時偶
相值一笑天宇局何當烹壑源看此粟米粥

獄中暴寒凍損呻吟

由心有癡愛癡愛乃有業因業疾病生痛此百骨節聲
相成呻吟齒頰空咬齧側眠看圜扉以手枕匣櫬觀此
心無形安得有業結業結如空華病寧有枝葉方作是
念時顛倒想即滅心造古佛樣路入法界轍稽首甘露
味銷此煩惱熱

御手委廉訪守貳監勘劄慶裕二十三日復收入
禁將入獄憂無人供飯有銀一兩錢六百以付來

勝甫勝甫曰此止可辦半月過此如何余默計曰
有官飯耳

出獄未兩月單身寄孤館別甌容搭餽酬以滌盥盞那
知復入獄親舊無半眼但餘半月糧何以供歲晏摩挲
沒柄杓准擬吃官飯來生空斂眉其室亦喟歎叢林明
白老寰宇洪覺範所至神物護爾輩見不慣我說此偈
已萬象俱稱贊

與黃六雷三

金史紀事本末卷八
我見應傭者忽得黃與雷結束頗精悍拱喏駭吾儕從
余今幾日臨事見肺懷立身守中直勿自無疑猜為奴
不欺主乃是廊廟材何必弄筆語然後為賢哉紛紛貴
與賤百年同一坏弛擔坐亦汝萬事付浮埃

送人

相送復相別不異雲間月無心去復來有魄圓還缺此
別興如何西風秋月初暮鴻千里至能寄八行書

別人

尺水未到海茲行多嗚咽病客未還家回腸蘊十結水
有到海期病客歸何時臨岐一揚袂落日寒風悲

次韻公弱寄胡強仲

念昔謫海南路塵吹瘴風未即棄溝壑尚在拴索中親
友半天下萬里不一逢髯胡豈有罪乃肯與我同情親
等昆弟使令惟西東時為解我語道大自不容邵陽雨
中別涕淚落無從我伴有形影渠歸無僕僮三年鍛百
巧遂成瘖與聾今日復何日嶽寺聞樓鐘聚觀迎萬指

登曉排千峯黃泉天復見白骨肉已重髯雖未對面音
問已喜通夫子佐岫嶽有道如葛洪筆力扛九鼎奇語
出遽忽長篇春爭麗送我歸新豐且約老南嶽幅巾追
瘦筇拊手輒大笑此計隨虛空山林當付我君事侯與
公麒麟未易繫健鷗那可籠

天台山中偶題

祖可

偃步入蘿徑綿延趣窅深僧居不知處彷彿清磬音石
梁邀屢度始見青松林谷口未斜日數峯生夕陰淒風

薄喬木萬竅作龍吟
摩挲綠苔石書此慰幽尋

天開巖

有朋

棲霞山後峯天開一巖秀
中有坐禪人形容竹栢瘦
飢餐巖上松渴飲巖下溜
愛步巖室前白雲起孤岫

桐花

雲松

亭亭南軒外楨幹脩且直
廣葉結青陰繁花連素色
天資韶雅性不愧知音識

古今禪藻集卷八

欽定四庫全書

古今禪藻集卷九

明釋正勉釋性通同輯

宋七言古詩

秋夜坐

遇臻

秋庭肅肅風颼颼
寒星列空蟾魄高
搢頤靜坐神不勞

鳥窠無端吹布毛

鳥窠禪師拈布毛而吹侍者悟道

早秋吟

契嵩 二首

山家昨夜房櫳冷梧桐一葉飄金井長天如水淨藏雲
明月含暉變秋景桂枝花折風飄飄誰在高樓吹玉簫
人間不見槎升漢天上將看鵲作橋年少征人在何處
白露霑衣未歸去海畔今無漂母家江南誰與王孫遇
徘徊月下空長吟吾徒自古難知音欲上高臺問明月
明月何不照人心

令泉亭獨賞寄冲晦上人

南風掠波溪水滿山中幽人來洗浣獨立溪傍清興款

更愛泉流芳草短平生幽討貴蕭散世道紛紜何足算
人間五月夏雲煩相約歸來君莫緩

北邙行

法泉

前山後山高我我喪車麟麟日日過哀歌幽怨滿巖谷
聞者潛悲薤露歌哀歌一聲千載別孝子順孫徒泣血
世間何物得堅牢大海須彌竟磨滅人生還如露易晞
從來有會終別離苦樂哀感不暫輟况復百年驚夢馳
去人悠悠不復至今人不曾古人意栽松起石駐墓門

欲為死者長年計魂魄悠揚形化土五趣茫茫井輪度
今人還葬古人墳今墳古墳無定主洛陽城裏千萬人
終為北邙山下塵沈迷不記歸時路為君孤坐長悲辛
昔日送人哭長道今為孤墳卧芳草妖狐穿穴藏子孫
耕夫撥骨尋珠寶老木蕭蕭生野風東西壞塚連晴空
寒食已過誰享祀塚畔餘花寂寞紅日月相催若流矢
貧富賢愚盡如此安得同遊常樂鄉縱經劫火無生死

感懷

祖心

風蕭蕭兮木葉飛鴻雁不來音信稀還鄉一曲無人吹
令余拍手空遲疑

偶作

日益

金谷春光長滿眼紅藥花梢香爛漫昨夜西風一陣寒
徧地殘芳落何限王孫醉倒不知歸猶向欄邊索金盞

寄王慎中教授

道潛十首

高人屏迹匡廬山不入州府今幾年煮葵烹藿日一飯
目光炯炯明星懸行脩道富神所憐絳帳弟子如雲煙

憶昨秋風宿曾巘杖藜扣戶君未眠塔松影月不到席
耿耿唯有青燈然高談一傾百慮洗似拂蒿艾披蘭茝
清詩落筆有餘地頃刻百紙珠璣聯錦囊別後有新句
勿惜東使聊相傳

寄題濟源令楊君蘭軒

昔人慕猗蘭佩服比脩潔往往卒歲間山中行採掇吁
哉昔人去已久此花憔悴今誰折濟源長官真好古王
屋天壇馳遠步陽崖月窟得芳叢滿握歸來誇所遇淨

掃幽軒植蘚堦紫莖綠葉弄竒姿
踈簾風軟日華薄芳馥滿懷君自知

春日即事呈定海尉葛叔忱

曾臺宿霞披滴瀝朝露濕有客獨登臨
含情空佇立問君佇立何所為
報言遠人嘗有期菊花黃日出山去
芳草綠時猶未歸萬壑千巖望何極
願託孤鴻寄消息少年游行易蹉跎
翻恐歸來不相識滿目春暉花爛漫
花底幽禽自相喚紘紘萬類皆有從
獨我參差邈雲漢勸

君不用長相思容顏消竭神空疲無情況有西樓月夜
夜清光照不虧

邵仲恭許相過金山未至

二月歸來江上居江流變淥江鷗去時移物改何足論
身世悠悠本非固鳩鳴屋角山雨餘花苞破紅滿芳樹
晴窓曉日幽興催振衣出戶凌高臺潮回浪死風色定
縹緲沙岸煙中開故人佳期絕消息滿眼空看暮雲碧
何日扁舟南渡來一洒高風破吾臆

訪彭門太守蘇子瞻學士

眉山鬱弟眉水清清淑之氣鍾羣形精瑯美璞不能擅
散發宇內為豪英煌煌蘇氏挺三秀豫章杞梓參青冥
少年著書即稽古經緯八極何崢嶸未央宮中初射策
落筆游刃揮新硯翰林醉翁發竒歎臺閣四座爭相驚
逡巡傳玩騰衆手一日紙價增都城同時父子擅芳譽
芝蘭玉樹羅中庭風流浩蕩播江海粲若高漢懸明星
前年聞公適吳會玉漿跪道人爭迎浮雲流水付幽討

下視世網鴻毛輕野人弱齡不事事白首丘壑甘忘情
神仙高標獨未識暫棄蘿月人間行朝吳暮楚失邂逅
惆恍夜夢還惇惇邇來旅食寄梁苑坐歎白日徒虛盈
彭門千里不憚遠秋風匹馬吾能征鈴齋吏退屬幽款
一省揮塵銀河傾

虛白齋

與子瞻共生有客饋魚於子
瞻瞻遣放之遂命賦是詩

嘉魚滿盤初出水尚有青萍點紅尾銀腮戢戢畏烹煎
掘強有時俄自起彼客殷勤贈使君願向中廚薦醪醴

使君事道不事腹杞菊終年食甘美傳呼慎勿付庖人
百步池邊放清泚回首無欺子產淳謾道悠然泳波底

陪子瞻登徐州黃樓

黃花離披秋日短使君無事邀僧飯飯餘軟語蕪香幽
共坐圓庵不知晚燭籠持火報黃昏使君愛客還留連
前登脩徑步超逸後却從御來聯翩城頭陰陰未月上
城下激激鳴潺潺漁燈照船沙岸近賈客夜唱聲清圓
徘徊始轉黃樓側銀箭銅壺知幾刻欄干倚徧惜分携

泣泣芙蓉珠露滴

次韻秦少游和子理梅花

朔風蕭蕭方振稿雪壓茅齋欲欹倒門前誰送一枝梅
問訊山僧少病惱強將筆力爲摹寫麗句已輸何遜早
碧桃丹杏空自妍嚼蘂香無此好先生携酒傍玉叢
醉裏雄辭驚雷掃東溪不見謫仙人江路還逢少陵老
我雖不飲爲詩牽不惜山衣同藉草要看陶令插花歸
醉卧清風軼軒昊

重居夜坐懷蘇伯達昆玉

狂風吹林聲怒號
隔垣洶洶如秋濤
夜闌稍覺羣動息
星斗挂簷霜月高
東鄰書生勤且勞
粲然文采真鳳毛
遙想下帷應未寢
短檠相對課離騷

過新開湖寄李端叔大夫

新開湖邊秋夢曉
雞犬無聲人悄悄
試揭踈篷覘日華
水面殘星猶繚繞
嘗聞明珠藏巨浸
光燄一出輝羣草
篙師為我暫停櫓
罔象終期入幽討
波間宛轉興方豪

依然別恨生懷抱故人離羣東海頭徇祿摧眉事枯槁
菰梢蘋末翠猶在蕙蘭憔悴青楓老浪游不知歲月徙
舊約無端失天杪目羨南鴻兩兩飛安得身同羽翰小
游胥堂在吾必行一榻數椽應預掃

廬山蓮社詠

懷悟

晉室凌遲帝紀侵羣英晦跡匡山陰樓煩大士揮麈尾
十七高賢爭扣几才高孰謂文中龍番使伊人思謝公
烟飛露滴玉池空雪蓮蘸影搖秋風

題李愬畫像

德洪十五首

淮陰北面師廣武其氣豈止吞項羽君得李祐不肯誅
便知元濟在掌股羊公德化行悍夫卧鼓不戰良驕吳
公方沈鷲諸將底又笑元濟無頭顱雪中行師等兒戲
夜取蔡州藏袖裏遠人信宿猶未知大類西平擊朱泚
錦袍玉帶仍父風拄頤長劍大梁公君看韉索見丞相
此意與天相始終

同景莊游浯溪讀中興碑

上皇御天功最盛生民温飽卧安枕醉凭艷姬一笑適
薄夫議之無乃甚長安遮天胡騎塵潼關戰血深没人
哥舒臣賊不足惜要鬻國忠如膾鱗蒼黃去國食不暇
馬嵬賜死謝天下反身罪已成湯心奈何猶有譏之者
取非其子又遽忽靈武君臣無忤容何須嗚咽讓袞服
自控歸鞍八尺龍誰磨石壁湘江上指拭雲烟濺驚浪
龍蛇飛動忠義詞顏色莊儼相向與君來游秋滿眼
閒行古寺西風晚道人興廢了不知但見游人來讀碑

洞山祖超然生辰

希郎真吾道門友初見忘年今耐久天機深穩道骨清
詩句誰令愕人口可憐佳處未全知但見茲篇氣渾厚
我生癡魯人所棄洞視曾中了無有但忻所至有青山
依倚叢林遮百醜君才一籌勝却我胡為包腰反隨後
人生嗜好調自殊海上舊聞人逐臭江南長憶好雲泉
今日雲泉長入手萬頃蒼然几案間作詩舉以為君壽
理毫聊為試水華小字明窓看揮肘

至豐家市讀商老詩次韻

楊柳護橋春欲暗
山茶出屋人未知
冒田決決走流水
小夫鏟塍翁夾籬
雨晴春巷生青草
烟濕人家營晚炊
心疑輞川摩詰畫
目誦匡山商老詩
夜投村店想清境
蛙滿四隣簷月移
卧看孤燈心耿耿
呼童覓紙聊記之

送子美友

曉痕翠浪行將徧
掠面柔風初翦翦
梅顛欺寒底死香
柳眼窺煙皺未展
相看感此故意長
欲別忍看春尚淺

離情惱人深造次
撩我小詩弄清婉
腸斷江頭無語中
謝郎匹馬嘶風遠

謝安道花壇

三月江南春不淺
謝家池上開花苑
層壇迸破碧瑠璃
嫩蘂簇成紅婉孌
一枝二枝和霧白
素娥月下逢姑射
十朵五朵照水紅
仙妹並立瑤池東
人生遇景須行樂
莫使餘香散簾幙
白雪難逃鬢上斑
金樽且對花前酌
醉則傲羲軒醒則歌
堯舜榮辱是非都
莫問風雲際會

自有時忠義果然天不困君今還作天涯客
凭闌正遇羣芳拆不挿羣英醉上林人謂少年真可惜
明年再獻平戎策順風高舉摩天翼大手親提却日戈
刈除天下開荆棘古人養花如養賢我今說花心亦然
栽培直欲助真宰扶持造化工陶甄時人莫以花為浼
大都自是人情改若使人情長似花相看顏色年年在
謝安道輩真難得不容蒿艾生墻側不勞巧手寫丹青
不學世人畫墻壁靈苗自有天然格門外溪光長瀉碧
更向溪光

種碧桃宛然便是神仙宅謝家池館勝瑤臺淺白深紅
次第開為報賞花君子道何須東海覓蓬萊

蒲元亨畫四時扇圖

畫工妙物無不可誰能筆端自忘我醉蒲睡著呼不聞
但見解衣礮礮羸起來漱墨滋滋破硯霜綃咫尺開紈扇
點綴四時無不有但覺眼前紅綠眩雲破連峯青碧開
林梢時復見樓臺斷橋落日空流水為問秦人安在哉
春山香靄知何處夏木森森蔽雲雨秋陰未破雪滿山

笑指千峯欲歸去看山對客憶峨眉容去愁多自不知
滿眼匡廬看畫軸平生坐媿虎頭癡萬事浮雲定何有
白鶴歸來千載後江山長在身世忙歲月不移舟壑走
對此未歸心欲折借君玉斧修圓月會看談笑滿清風
詎使人間畏炎熱

寄蔡子因

平生閱詩如閱馬自憐雙眼如支遁子因句法馬羣空
爽氣橫秋太神駿上苑花光纏肺腸西湖霜曉磨風韻

較君年少翰墨場賈生仲舒覺寒窘醉中逃禪亦不惡
况復機鋒類龐蘊奉身一飯聊自珍富貴功名苦尋趁
鳳巢定生五色雛文章從來論種性嗟余索寞卧空山
多生垢習消磨盡但餘欲識天下英斃蛇脊尾猶一振
歲月去人江浪翻何時仰此摩天峻

驟雨

雷掣雨骨天為低行雲趨走不敢遲桐英滿地誰拾去
花態正顰魂欲飛紫金蛇光誰掣斷墮空萬點跳珠亂

須臾井滑紺無泥
瑠璃骨軟爭道馳
亂紅殘萼驚千片
可憐憔悴吳姬面
林光草色自連天
殘香依約知誰怨
再游三峽贈文上人

肉身大士延平公
眉毛如雪聲如鐘
東坡醉眼亦多耳
信口呼作僧中龍
坐令玉色煙蠻裏
晨鐘暮鼓三千指
而今骨冷撼不應
青燈白塔臨寒水
上人談笑有精色
聞是延平坐中客
紫霄峯下曾相逢
別來幾何頭已白
地爐夜語尋前事
當日交游半生死
與君等是三眠蠶

浮世百年那免此我尋舊游聊自娛忽然見君懽有餘
一笑且從吾所適後會重來知有無

浙竹

龍孫初長浙江曲踈影蕭蕭濯寒玉平生知愛足風流
只有山陰王子猷而今流落蒼崖頂暗換年光鄉路永
冰敲雪壓未應衰鸞鳳不棲空故枝堅幹猶堪製長笛
最合宮商勝金石為君吹動鏡湖秋驚起雙龍翼小舟

送凝上人

我生風韻無塵埃揚清激濁心不回少年不忍混白黑
出言動輒為身災突汀出岸水必拍喬木頽林風必摧
乃知此世要不免毀譽於吾何有哉君今欲脫此等憂
獻君一策真良謀人言白璧為石頭唯唯慎莫分劣優
坐中亦復發一語衆將環視如仇讎此策簡截君牢收
飽食熟睡且隨流泛然四海無不可人將愛與君同流

張野人求詩

醉看湘山二十春杖藜疾趨旋路塵兒童拍手呼不住

並行磨之不怒瞋人間禍福本無象引手按之如有神
草屨不踏公卿門術中玉石兩俱焚不知世上有憎愛
一味但學山林尊得錢行沽付一醉兒啼妻號了不聞
孔仲山為阿里卒吳門亦藏梅子真何年笑跨紫雲去
舉手山頭謝世人

送友人

幽人獨負三尺琴自謂羲皇得意深經年不肯鼓一曲
欲造千里求知音夕陽渡口西風起黃葉紛紛墜秋水

送君默默上孤舟，片帆忽舉風波裏。此去吳中風物好，
重複江湖我曾到。桂子落時雙澗秋，白猿啼處孤松老。
却入苕溪凡幾里，連天震澤無窮已。紅葉苞拆流水香，
紫萼絲軟鱸魚美。何時興盡見歸舟，古今客路多飄流。
孤雲別鶴無蹤跡，空聽蟬聲野渡頭。


送因覺先

南澗茶香笑語新，西洲新漲小舟橫。困頓人歸爛漫晴，
天迴遊絲長百尺。日高飛絮滿重城，一番花信近清明。

秋懷

祖可

霜禽驚呼山麓音
霜風急吹溪上林
羲和攬轡不可緩
夏后苦身驚寸陰
橫河明明月皎皎
遠山蒼蒼水深深
哀鴻萬里繞雲陣
遊子不眠中夜心



古今禪藻集卷九

欽定四庫全書

集部

古今禪藻集卷

十二

詳校官庶吉士臣謝恭銘

主事銜臣徐以坤覆勘

總校官庶吉士臣倉聖脉

校對官中書臣葉 葵

謄錄監生臣馬紹基

欽定四庫全書

古今禪藻集卷十

明釋止勉釋性通同輯

宋 五言律詩

晚次江陵

簡長 二首

楚路接江陵倦行愁問程異鄉無舊識多難足離情落
日懸秋樹寒蕪上廢城前山不可望斷續暮猿聲

書行肇師壁

禪徑秋苔合寒窓帶雨痕
心真冥自契句好與誰論
露冷蛩聲咽風微葉影翻
白雲如有意終日在前軒

塞上贈王太尉

慧崇 二首

飛將是嫖姚行營已近遼
河水堅渡馬塞雪密藏
鵬敗旅殘旗在全軍列帳
遙傳呼更號令今夜掠天驕

同寇萊公探得池鷺分明字韻

雨歇芳塘溢遲回不復驚
暴翎沙日暖引步鳥風清
照水千尋迴棲烟一點明
主人池上鳳見爾憶蓬瀛

懷廣南轉運陳學士

希晝
二首

極望隨南斗迢迢思欲迷春生桂嶺外人在海門西殘
日依山盡長天向水低遙知仙館夢夜夜怯猿啼

斷碑

片玉侵寒折零文見斷蟲遠沉岡草際半露塹水中跡
著人何在年銷事已空唯聞壞陵栢相吊起秋風

金陵懷古

保暹
二首

石城秋月滿烟水冷蕭蕭戰氣悲千古歌聲散六朝螢

飛宮草暗霜白井梧凋竟日秦淮上思賢莫可招

寄徐任

故鄉書久斷寒夜起歸心遠路秦關外啼猿閣深貧
遊年暗改醉卧月空沈幾夕疎林下相思廢靜吟

弔屈原呈王內翰

文兆 二首

抱清誰可羣委質在湘濱今日不同楚無人更似君滄
波沈夜魄古廟聚寒雲弔罷踟躕處漁歌忍獨聞

寄行肇上人

詩禪同所尚邂逅在長安為客閒相似趨時懶一般分
題秋閣迴對坐夜堂寒未遂歸山計流年鬢已殘

送史館李學士任和州

惟鳳 二首

歷陽南望極岸遠石城危去夢驚潮斷行吟見鴈隨淮
帆向風濶楚木落秋遲到日應閑卧公心帝自知

寄登封韓殿丞

前秋登閣晚吟次見晴雲中嶽聳當縣三年靜對君朱
衣借客典清俸買書分別後逢搖落相思隔晉汾

塞上贈王太尉

宇昭

嫖姚立大勲萬里絕妖氛
馬放降來地鵬聞戰後雲
月侵孤壘沒燒徹遠蕪分
不慣為邊客宵笳懶欲聞

遊靈隱寺

道諫

長吟遊古寺九里入青松
鳥向花間語僧從月下逢
陰廊連碧殿清磬雜疎鐘
回首夕陽晚烟霞鎖亂峯

送禪友

可士

一鉢卽生涯隨緣度歲華
是山皆有寺何處不為家
笠

重吳天雪鞋輕楚地花他年訪禪室寧憚路岐賒

羣賢宿山賦得暮雲崑下宿

契嵩 六首

微風靜林杪紅日下巖阿明月出已滿白雲歸未多高
應伴猿鶴深不暗松蘿若弗為霖去其如旱歲何

浙江晚望

暮色看無際秋空水混天片帆飛鳥外新月落潮邊隔
越山形小吞吳地勢偏幾人來往老早晚渡頭船

郎侍郎致仕

平時獨高謝道勝欲韜光白髮辭明主青山戀故鄉
藥畦容鶴到吟徑恐雲藏更愛禪林卧時來拂石床

汎若耶溪

越水乘春泛船窓掩又開好山沿岸去驟雨落花來
岸影樵人渡歌聲浣女回滄浪無限意日暮更悠哉

送客還北闕道中作

北郭送陽子日斜歸舊居路泥侵曉潤晦月逼春餘
桑柘雨中綠人烟闕外疎依然見風俗歸興混樵漁

次韻酬楊公濟寄東禪師之作

翛然林下隱吾道異夫君習忍如幽草觀身類片雲人
情無意染鶴唳有時聞謝客詩懷寄憐君此興勤

悼趙清獻公抃

法泉

仕也邦為瑞歸歟世作程人間金粟去天上玉樓成慧
劍無纖缺水壺徹底清春風激水路孤月照雲明

弔黃龍和尚塔

克文

示滅師何速空遺塔此中僧聞四海錫誰復九年風鳥

外十峯遶人間一徑通寥寥朝與暮唯有白雲同

再遊鶴林寺

道潛 二首

招隱山南寺重來歲已寒風林驚墜雪雨澗咽飛湍壁
暗詩千首霜清竹萬竿東軒謫仙句洗眼共君看

都下曉霽

千門昨夜雨萬木曉生光御水浮紅藥宮雲麗粉墻轉
樓遲日靜縈草亂絲長想像西池路濃陰覆綠楊

次韻龍直夫秘校細雨

細雨連阡陌輕雲濕不飛池寒鷗自卧巢冷燕催歸慘
澹疑沈樹飄蕭忽近幃簷花霑已久稍欲墮人衣

其二

薄霧兼寒雨凌晨靄未分細宜池上見清愛竹邊聞斗
帳侵蘭夢虛櫺逼蕙薰晚來欣小霽鈎箔見疎雲

其三

傍砌飄纔斷從風強更來斑斑泣蛛網浥浥汗江梅薄
日光時漏曾陰意未開少陵心易感詩句寫清哀

次韻謁子美祠堂

德洪

顛沛干戈際，心常繫洛陽。
愛君臣子分，傾日露葵芳。
醉眼蓋千古，詩名動八荒。
壞祠湘水上，烟樹晚微茫。

題瀉源

臨機不墮照如水，已知源從此。
常流出其聲，雜語言算沙。
嗟意馬捉月笑，情猿若解提空印。
休登立雪軒。

贈鄒顏徒

肉眼剝皮相，高才多陸沈。
火知三日玉，貧試一生心。
世

路多追逐雲山獨見尋聖賢酌古力勸子手勤斟

題會逢原醉經堂

酌古有深意開編中聖人百家笑糟粕六藝飲全醇兀
若墜車適益如浮蓋春淳于吞一石同味不同塵

燈花偶書

岑寂一間僧春宵清興增竹窗催夢雨蘭室對祥燈世
事知虛幻人情剪愛憎短長都分定不恨百無能

早行

失枕驚先起人家半夢中聞雞憑早晏占斗辨西東
濕知行露衣單怯曉風秋陽弄光影忽吐半林紅

秋夕示超然

夜色已可掬林光翻欲流一鉤窺隙月數葉攬眠秋
清境扶歸夢殘缸替客愁搜詩時畫席忽覺此生浮

鍾山有花如比丘狀王文公名為羅漢花僧請賦詩
通力元無礙隨緣自應真此生花上露故現葉間身
知見幽香在伽梨翠色新一枝聊把玩未愧鷲峯人

宋六言絕句附

夏日山居十首

道潜
二十一首

杜宇鳴春已歇
薔薇尚有餘花
吾廬宛同彭澤
逸屋美
蔭交加

苦笋爭抽豸角
枇杷競吐驪珠
午飯松間睡足
茶甌滿
泛雲腴

紈扇輕裁孤月
竹簟冷織雙紋
呼取涼襟幽吹
拂開亂
眼浮雲

麥浪遙翻隴底雲，峯忽起空端。
拄杖支頤松下直，須細細吟看。

山月明含草木溪，風暗度襟裳。
寂寂簾櫳夜半羽，蟲相趁飛揚。

陰洞石床初掃誰來共，飯胡麻。
鳥道新疏碧，注為君沈李浮瓜。

古徑斜依杉竹薰，風永日無人。
噪鵲鳴鳩去後一聲幽磬南隣。

門外溪行碧玉林梢日墮黃金好景莫愁吟盡會看月
出遙岑

山雨洗開林幄梧桐日射荆扉傍砌榴花初吐照人特
地光輝

遠壑尚餘殘照飛蚊已鬧前簷巢燕歸來何暮呼童為
汝開簾

與定師話別四首

客有來從東越示余滿把瓊瑤萬壑千巖鍾秀故知多

士翹翹

雪解松筠振色氣回蘭蕙含芳興動剡溪吟客夢先歸
鳥飛翔

出海濤雷方震橫江雪陣如山一葉舟輕飛燕飄然掠
水東還

鳳唳山含暮靄西陵月破黃昏慣作江湖離別未應當
此銷魂

次韻聞復湖上秋日

澤畔蒹葭蕭瑟露華落日珠浮撫事少陵多感萬端獨立懷憂

禪餘偶登絕巘據石聊為欠申眼界謾分畦畛誰知大道無隣

處士尚餘陳迹斷碑橫卧林塘婉約梅花秀句騷人萬古傳香

江城秋至幾日風物陡覺淒涼隣女機絲何有夜聞促織悲傷

人物年來衰謝背繩追曲周容嗟爾得時螻蛄故能嘲
哂龜龍

涼月娟娟清媚舒光巧入簾櫳萬籟聲同比竹細窺一
空中

可怪狙公巧黠猶迷暮四朝三老我身如枯枿兀然不
動幽巖

悼黃山谷三首

德洪十七首

自顧面無四目何止心雄萬夫和得靈源雅曲繡繡更

縮流蘇

鬚鬢滄浪夢幻江湖厭厭平生一旦便成千古壞桐絃
索縱橫

平昔馭風騎氣如今夜雨荒丘欲慟西州華屋空餘南
浦漁舟

寄李端叔三首

老去田園可樂秋來禾黍登場相見雞豚社飲誼譁暖
熱谿堂

數疊夕陽秋巘雨餘眼力衰時可是招要歸思故應醞
造新詩

月下一聲風笛尊前萬頃雲濤玉堂他年圖畫卧看今
日漁舸

舉世誇君筆語霧豹渠知一斑莫問人間非是且看醉
裏江山

寄巽中

文章風行水上歲月舟藏壑中自怪頂明玉鉢人疑筆

夢春紅

送實上人還東林二首

世事但堪眼見此生何殊夢游未倩青山掩骨且牽黃
衲蒙頭

有客惠然過我踈眉秀骨巖巖且復揉搓凍耳聽君放
意高談

遊鍾山宿石佛峯下因上人自歸宗來贈之三首

曾共故山寒食忽驚廬嶽重陽想見洞庭橘柚累垂又

出青黃

世議嗟嗟迫隘白頭相視如新只有淵明似我逢人故
面成親

西風夜吹客夢霜清更入鍾山且作跳魚縱壑會省倦
鳥知還

山居

深谷清泉白石空齋斐几明窓飯罷一甌春露夢成風
雨翻江

和人春日

暖厭催花小雨晴
宜到面和風鶯舌管
絃合調蘭芽雪
玉分叢

答慶上人

連日顛風斷渡一番花
信催春殘夜華鯨
吼粥夢回窓
月窺人

贈瀉山相書記

山學春愁眉黛水如含
笑花香睡起憑高凝睇
淺紅數

筆殘陽

古今禪藻集卷十

欽定四庫全書

古今禪藻集卷十一

明釋正勉釋性通同輯

宋

七言律詩

元日

契嵩 三首

暗裏春催曙色明
百雞迎曉報新聲
宿寒尚在龍蛇蟄
歲歷初傳日月迎
蓂葉四時今始發
梅花一旦占先榮
山家也祝堯天壽
漫學牛山報太平

誠題 因事

高吟遠矚倚雲梯
往事經心盡可題
道德二篇徒自辨
是非一馬豈能齊
暉山真玉傷驚火
失水靈蛇畏在泥
寄語冥鴻上天去
凌雲羽翼莫思低

送公濟仲晦出山兼簡駐泊李思文

幾日山遊霰雪稀
相隨野老亦忘機
始憐洞裏雲間卧
又憶人間歲杪歸
夜落梅花應滿路
風含春色自吹衣
憑君為話王孫道
音信終須寄雁飛

浮槎山

用孫

在廬州府古傳自海浮來有梵僧過曰此耆闍
一峯也梁武帝女為尼於山建道林寺歐陽修

有記

山為浮來海莫沈蕭梁曾此布黃金梵僧親指耆闍路
帝女歸傳達磨心地控好峰排萬仞澗餘流水落千尋
靈蹤斷處人何在日夕雲霞望轉深

山居二首

延壽
二首

古樹交盤簇徑深闐無人到為難尋祇知筭計千般事

誰解消停一點心凍鎖瀑聲中夜斷雲吞嶽影半天沈
寒燈欲絕禪初起透牖踈風觸短襟

祇知閒適樂簞瓢莫訝烟霞道路遙龍穴定知潛碧海
鵬程終是望丹青撥雲巖下求泉脈嚼草坡邊辨藥苗
門鎖薜蘿無客至菴前時有白雲朝

覽秀亭

道潛十三首

飛甍巨棟出高墉覽秀開亭實有功溢水秋橫簾幙外
廬山晴落酒杯中俯窺城郭千艘轉仰見星河四面同

江左元規存舊觀孟侯還此繼高風

廣陵城外野步呈孫莘老學士

林梢聒聒鳥聲繁積雪初消澗水渾老樹卧波寒影動
野煙浮草夕陽昏風回笛響山前路犬吠人行竹外村
杖屨不知幽興遠歸來新月在柴門

次韻姜伯輝朝奉宿九曲池

當時樓闕已桑麻陳迹何須置齒牙宛轉頽城圍綠野
嶽崱孤塔背明霞山雲度曉飛瓊葉海月生秋墮桂花

金少巳五
卷十一
圓嶠方壺同笑語終宵疑在水仙家

次韻秦少游寄李齊州

畫船京口見停橈
瀟洒渾疑謝與陶
但把好山供勝踐
不將餘論掛塵勞
諫垣天上空焚草
藩國年來屢夢刀
北客近傳新政美
未嘗因物強吹毛

次韻朱伯收主簿觀雪

朝來密雪蔽天涯
坐目丘園發素華
初著敗梧驚擁腫
久霑庭竹見歌斜
水精不動垂千筋
雲母無聲落萬家

安得曾穹返收拾莫教狼藉渾泥沙

自彭門回止淮上因寄子瞻

竭來淮上卧蕭宮回首人間萬事空
院靜水沈銷薄幔
睡餘寒日耿脩桐
南山訪古思
杯渡北海談
經憶孔融
寂寞蒹葭霜雪後
何時重倚玉青葱

與曾逢原寺丞相別

落葉追奔卷地飛
淮流轉處楚山稀
君騎黃鵠朝天去
我憶青松舊壑歸
道在不須驚契闊
情親聊用惜分違

金史曰... 卷十一
巖居祿隱都如夢莫向秋風歎式微

夜泊淮上復寄逢原

黃沙白草滿淮陰
逆旅蕭條思不禁
風約亂雲歸隴首
角催明月出波心
槎頭涌處潮初上
斗柄移時夢未沈
遙想故人投宿地
畫船應在碧榆林

曉發桃源渡寄端叔

桃源渡頭雞一鳴
舟子夜起趨南行
泯泯河流浮落月
蕭蕭岸木警秋聲
依人翡翠霜翎重
拂棹芙蓉露點輕

為報舊游朝士說天街何似此中清

夏日龍井書事呈辯才法師兼寄秦少游在越

竭來人外慰棲遲谷遠山長萬事遺好鳥未嘗吟俗韻
白雲還解弄竒姿藤花冉冉青當戶竹色娟娟碧過籬
不羨故人探禹穴短橈孤榜逐漣漪

程公闕給事罷會稽道過錢塘因以詩見之

江干千騎送朱輪父老無緣借冠恂吳國旌旗開白日
越溪桃李失青春雄名素與珠星爛妙質長隨玉樹新

當宁比聞思舊德萬方行見入洪鈞

覽黃子理詩卷

六載南宮何所營百篇翻覆見高情霜鷗露鵠元非俗
雪竹風松本自清俊逸固宜凌鮑照優游真已遍淵明
微言會有知君者漫擬鍾嶸試一評

梅花寄汝陰蘇太守

湖山搖落歲方悲又見梅花破玉蕤一樹輕明侵曉岸
數枝清瘦耿踈籬良辰易失空回首習氣難忘尚有詩

所向皆公舊題墨肯辜魚鳥却來期

石臺夜坐

德洪 六首

故鄉乃有此叢林下板何妨著寂音永與世遺他日志
尚嫌山淺暮年心凍雲未放僧窓曉折竹方知夜雪深
琢句自應清似玉更宜坡字硬黃臨

贈王司法

輕帆已有渡江期高會清游惜此時水閣颺烟晴試茗
雪窓剪燭夜論詩衝寒遠雁來橫浦弄色新梅半糝枝

林下自知無一事亦應風月動關思

和許樂天

滄溟曾見化微塵
花發桃源幾度春
俗眼莫輕狂道士
此身應是謫仙人
清彈一曲悲風遠
絕唱千章白雪新
異日三茅成卜築
却因瓶錫得為隣

贈靜上人

雪摧枯慮默如瘖秋
壓寒松老不禁一室
閉門稀識面
半窓斜照自拴針
重城此日留詩別
疊嶽何年結伴尋

衰退寧堪久塵土相看滿眼是歸心

送僧遊南嶽

古寺間闌聊作招夏秋歸思漫迢迢枕中柔櫓驚鄉夢
門外秦淮漲夜潮想見舊房生薜荔不堪踈雨在芭蕉
何時却理緣雲策峯頂同誰看石橋

上元宿百丈寺

上元獨宿寒巖寺卧看篝燈映薄紗夜久雪猿啼嶽頂
夢回清月在梅花十分春瘦緣何事一掬歸心未到家

却憶少年行樂處軟紅香霧噴京華

上淨慈北磻簡和尚

元肇

橘洲

一作州

骨冷不容呼正始遺音埽地無一代文章歸

北磻十年梵語落西湖人皆去獻遼東豕我獨來瞻屋
上烏春暖閉門無恙否楊花飛作雪糝糊

居簡禪師後隱飛來峯有北
磻集十九卷盱江張誠子序

楊梅

五月楊梅已滿林初疑一一價千金味方河朔蒲桃重

色比瀘南荔子深飛艇似聞新入貢登盤不見舊供吟
詩成相寄山中友恐解樓頭愛渴心

宋

五言排律附

王舍人路分生辰

德洪 二首

貴出賢王裔宗連母后姻秋容漱毛骨春色照簪紳報
國忠誠著驚人句法新慣看青禁月屢夢玉關塵博古
知無敵窮經亦絕倫後宵通七夕今日是生辰佳氣凌
湘浦飛烟壓楚閨綠醺浮白螳綺席繞花輪壽綴諸天

獻詞容野客陳不凋蟾窟桂難老海山春已作瞻雙闕
行看據要津功名先入手圖畫在麒麟

陳奉議生辰

華國生賢俊江山孕秀靈鴨頭淦水綠螺髻玉筍青斂
捷收科第竒豪見典刑笑談回暖律詩句挾風霆官偶
求彭澤才宜在漢廷麒麟橫逸氣鸞鷲斂修翎民訟多
間日棠陰自滿亭浪傳書課奏須看鼎彝銘仲夏逢佳
節非烟聚杳冥數莫餘一葉推道間千齡阡陌登豐後

笙歌爛漫聽綺筵環妙麗壽筇捧娉婷歡洽連更燭情
高促畫屏九衢花照夜萬井月開扇風颭銀河動天驚
玉露零三台星密處旁有老人星

宋

七言排律附

題惠山翠麓亭

仲殊

素虬盤屈走靈泉榭葉塗紅作畫船幡轉玉繩光影旋
杯銜金鏡酒痕圓篆形綵字方傳世星落光躔忽下天
遠想螭蟠殊未若小圖河曲宛依然緩浮松釀環雲際

不動蘭橈到席邊上已浮恩非此日山陰盛事掩多年
從歡未省向樽俎屢酒何嘗議聖賢翰墨主人今獨步
雙鳧應復降飛仙

宋

五言絕句附

清溪

契嵩

勿謂清溪清長如鏡初洗須防苟容物汗爾清到底

賦王立之承奉園亭大裘軒

道潛

四首

經綸志四海齟齬不得申大裘縱千丈姑覆洛陽春

載酒堂

子雲草玄時載酒客常滿君今慕若人竹戶誰來欸

永日亭

長安貴富人歲月馬上遷岸巾怡永日心事獨翛然

泠然齋

虛室晝生白清風襲衣屨圓蒲燕坐人泠然欲仙去

題僧房壁

清順

竹暗不通日泉聲落如雨春風自有期桃李亂深塢

登北固樓

法平

不負南徐眼來看北固雲金焦兩山小吳越一江分

古今禪藻集卷十一